


Na ABN Amro Bank:

DIA 3 DI FEBRUARI LO CLAUSURA EXPOSICION DI PINTURA DI ELVIS TROMP



ORANJESTAD (AAN) -- Te dia 3 di februari venidero ainda, publico por aprecia e obranan di e pintor Arubano Elvis Tromp, cu ta den ex-

posicion riba e murayanan di Oficina principal di ABN Amro Bank N.V.

Manera ta conoci desde momento cu e renovacion di e edificio di e banco menciona a termina na September aña

96, e idea a surgi pa duna nos pintornan un espacio pa expone nan cuadranan, loke segun Marion Bareño, fun-

cionario di ABN Amro Bank N.V. a comenta, den un entrevista cortico cu DIARIO, ta bay keda continuo.

No solamente e artistanan ta haya oportunidad pa presenta nan pinturanan y pone informacion pa e publico interesa por tuma contacto cu nan,

loke sin duda ta un estimulo grandi pa nan, sino cu e murayanan di e banco ta resplandece cu obranan interesante, creativo, yen di armonia y color, cu nos artistanan ta produci a base di nan talento. Ademas di nos mes hendenan, tambe e turistanan of personanan cu ta bin di afo pa asuntunan di negoshi y ta bishita e banco, ta cera conoci cu un parti di e arte y cultura di Aruba.

Varios pintor ya caba a haci uso di e murayanan di ABN Amro Bank N.V. di September te awor, y e idea ta pa seguidamente na e clausura di e exposicion di Tromp, presenta e trabao di otro pintor y asina sucesivamente, unda cu e empresa a dicidi tambe pa alarga e periodo di cada exposicion pa diez siman.

Pa haci esaki tin personanan den e banco cu ta encarga cu e parti organizativo pa pone e exposicion, entre otro, Marion Bareño mes, cual trabao ta hopi liga na relacionnan publico.

Ayera mainta DIARIO por a observa cu e obra di Elvis Tromp, por cierto un persona sumamente senciyu y agradable, ta capta hopi atencion di



e publico. Elvis ta yama su mes un "autodidacta" pero sin duda el a nace cu e talento y habilidad di un profesional caba, ya cu su trabao ta minucioso y impecable. E pinturanan cu por aprecia den e exposicion menciona ta di corte realista, pero Elvis su obranan surrealista tambe ta masha impresionante mes.

